

ORATIO  
DE  
TABERNIS MONTANIS,  
VETERIS OLIM COMITATVS,  
NVNC DVCATVS, BIPONTINI OPPIDO,  
*HABITA ET RECITATA*  
A. D. IV. KAL. OCTOBR. ANNO clslcccxxx,  
CVM SOLLEMNIS GYMNASII BIPONTINI  
PERAGERETVR LVSTRATIO;

A  
FRIDERICO IVLIO MARX,  
TABERNAEMONTANO,  
*PRIMAE CVRIAE ADSCRIPTO.*

---

BIPONTI

EXCVSA IN TYPOGRAPHEO  
GEORGII NICOLAI,  
ANNO AERAE DIONYSIANAE  
clslcccxxx.

*BVRCARD. GOTTHELF STRUVE*

in praefatione ad Corpus Historiae Germaniae.

Quum plura sint boni ciuis officia, tum illud, meo quidem animo, non ultimum debet duci, patriae excolere Historiam, deque incrementis eiusdem atque ornamentis serio cogitare.

VIRIS  
*NOBILISSIMIS, AMPLISSIMIS, CONSULTISSIMISQUE,*  
GEORGIO FRIDERICO MARX,  
SERENISSIMI DVCIS BIPONTINI CONSILIARIO,  
ET PRAEFECTO TABERNAEMONTANO,  
*PATRVO SVO AC PROPATRI*  
*OMNI PIETATE ET REVERENTIA AETATEM COLENDO,*  
ET

FRIDERICO IOACHIMO MARX,  
SERENISSIMI DVCIS BIPONTINI  
IN PRAEFECTVRA TABERNAEMONTANA AB COMMISSIS  
NEGOTIIS, ET CONSISTORII, QVOD REFORMATIS  
BIPONTI EST, ADSESSORI,  
*PATRI*  
*VT INDVLGENTISSIMO, ITA MAXIME DEVENERANDO,*

SALVTEM, PERPETVAMQUE FELICITATEM  
OBSERVANTER PRECATVR

FRIDERICVS IVLIVS MARX.



# VIRI NOBILISSIMI, AMPLISSIMI, CONSVLTISSIMIQUE,



Id maxime in scriptis quibuscunque dedicandis spectare decet, uti in eorum appareant nominibus, quibus & plurimum debemus, & qualiacunque pietatis nostrae monumenta grata, acceptaque fore, certa spe praesumere licet, non aliis profecto ullis, nisi Vobis haec mea offerenda ac dicanda est oratiuncula.

Etenim si tuam, PATRVE Amplissime, singularem in me benevolentiam, cunctaque ea, quae abs Te adhuc ad me ornandum, iuvandumque profecta sunt; si tuum quoque, PATER plurimum uenerande, mirificum ac perpetuum de me ad omne uirtutis, humanitatis, sapientiaeque decus quam liberalissime educando studium, curamque cogito, tantum certe me Vobis unis debere sentio, quantum nepos patruo, filiusue parenti unquam debuit. Iam, cum nil magis in uotis Vos habere uideo, quam ut in studiortum, quod, suppre-

premo Numine fortunante, inii, curriculo alacriter  
pergam, opereque iplo ostendam, Vos, quod impen-  
sae usque huc fecistis, non inutiliter apud me collo-  
caste, paullo equidem in Vos essem iniquior, si primum  
hoc diligentiae, quam bonis litteris impendi, speci-  
men, minus Vos gratum, iucundumque habituros  
esse uererer; maxime cum de *Tabernarum* nostrarum  
antiquitatibus, rebusque aliis notatu dignis agat, quas  
legendi, cognoscendique cupidos Vos esse, uel ideo ar-  
bitror, quod in eis non solum domicilium suauissime  
habetis collocatum, sed amplos etiam honores non sine  
maxima uestra laude sustinetis.

Quae cum ita sint, accipite id uultu, animoque eo,  
quo me identidem excipere soletis, hoc est, benignissi-  
mo, & tabellae sponsoariae loco a me oblatum putate,  
quo perpetuam quandam pietatem, obseruantiam,  
cultum, obsequiumue paratissimum publice Vobis  
transcribo, idque simul sancte polliceor, nihil mihi  
magis curae, pensique futurum esse, quam ut summis  
ac perpetuis Vestris erga me beneficiis sic utar, ut, quod  
maxime oro, Vestram consuetudinem & liberalitatem  
in me tuendo constantissime retineatis.

Quod superest, DEVM rogo atque obsecro, uti Vos  
saluos, florentesque bono familiae nostrae, cuius de-  
cora estis atque columnina, ad summam senectutem ui-  
uere iubeat. VALETE. Dabam ex aedibus Gym-  
nasiu Bipontini prid. Non. Decembris  
an. M D CCXXX.



Go uero , *AVDITORES*, natalibus,  
*honoribus, meritis, litteris splendidissimi*  
*atque ornatissimi*, commilitoni meo, cui  
 in hac dicendi prouincia succedere iussus  
 sum, non parum eo nomine me debere fateor, quod  
 in orationis suae argumento, uobis probando, eas ex-  
 posuerit rationes, quibus & egomet adductus sum, ut  
 prae omnibus aliis argumentis, quorum in pertracta-  
 tione uirium mearum nouum edere potuissem speci-  
 men, de *Tabernis montanis* mihi dicendum existima-  
 rim. Solum enim mihi eae sunt patrium, idque non  
 minus mihi carum, non minus dulce atque iucundum,  
 quam ei *Bipontum*, de quo, uobis, ut uultus ille uester  
 ad omnem humanitatem compositus praetulit, benigne  
 approbantibus, disseruit. Quam erga patriam, si qui-  
 dem ita loqui fas est & conuenit, pietatem meam,  
 quum uobis similiter non improbatum iri confidam,  
 unum id, antequam ad rem ipsam accedam, facien-  
 dum puto, ut omni uos obtester obseruantia, quam ei  
 praestitistis, & mihi benigne praestetis patientiam.  
 Eam uero uos mihi praebituros esse, hoc maiori spe  
 atque fiducia praesumo, quo maiore cum uoluptate  
 A me-

mecum reputo, quanta beneuolentia cum illum, tum ceteros omnes, qui usque huc de patriis oppidis hoc in loco uerba fecerunt, prosecuti estis; quin, quanta memet ipsum, proxime peracta studiosae iuuentutis lustratione de unico nostrae salutis auctore, IESV pro nobis patiente, ad crucis supplicium ducto, perorantem audiuitis.

Quae cum ita sint, in ipsam statim argumenti tractationem eo ordine ingrediar, quo uobis modos *Biponti* insigniores enarratae fuerunt. Atque adeo a prima oppidi nostri ordiar origine; quae nos hoc breuius detinebit, quo clarior ipsa est certiorque.

Eam uero ad Romanos refert. Cum enim illae, quae hic loci sunt, angustiae iter aperirent in Vofagum, iis maxime e re uidebatur, eas praesepire, munire, firmare, ut barbaros, qui crebris, immo continuis fere irruptionibus Galliae fines infestabant, aditu intercluderent. Ut autem militi, in statione hic posito, suppeteret, unde uitam toleraret, ac muniis militaribus obeundis par esset, tabernas quasdam iuxta munitionem istam exstrui curabant, in quibus cum commeatus, tum res, quibus indigebant, aliae reponerentur atque asseruarentur. Erat enim ipsis in more positum, non solum in uiis publicis ac militaribus, ad interiuigendum ac mansionem quaerendam, tabernas



nas quasdam excitare\*; uerum etiam iuxta fauces, quas operibus clauferant, id genus hunc ipsum in finem statuere\*\*. Ad has uero annonarias, ut ita loquar,

## A 2

do-

\* Quales quidem fuere *Tres illae Tabernae* in uia Appia, *Claudis Appii Caeci* opere; quarum *Lucas*, scriptor *Astorum Apostolicorum* diuinus, cap. XXVIII, 15 mentionem facit; earumque rudera suo adhuc tempore superfuisset scribit *Ioan. Henricus a Pflaumern* in *Mercurio Italico* p. 316. *Rignae* item illae *perenni fonte Tabernae*, in uia publica, quae *Binga* olim in *Treuiros* duxit; quarum *Ansonius* in elegantissimo carmine, quod *Mosella* inscribitur, §. 8 meminit: situm uero earum longe uerisimilius nobis *Clunerus*, uir rerum geographicarum cum ueterum, tum recentiorum scientia in primis clarus, lib. II *Germaniae antiquae* cap. XIV p. 62 ostendit atque explicat, quam *Freherus*, uir ceteroquin doctissimus, *commentario* in poema istud, summi uiri, *C. S. Schurtzschii*, iudicio, egregio plane, & historiae Germanicae, quae a *Rheno Mosella*que prima initia ducit, perutili, ad h. §. col. 10 & 11.

\*\* Argumento nobis sunt *Tabernae* in *Tribocis*, uernacula *Elfsas-Zabern*, & ipsae ad radices *Volagi* sitae. Erant enim munimentum, arcendis barbarorum incurfibus conditum, ut *Ammianus Marcellinus*, grauis scriptor, lib. XVI cap. XXI p. 6 diserte dicit. Quod ipsum, cum ab *Alemannis* subuersum fuisset, *Iulianus* Caesar omni contentione reparauit, ut idem *Ammianus* l. d. refert, simulque monet, *Tribus* his *Tabernis* resecis, instauratisque *Germanos* arseri, qui in intima Galliarum penetrare consueuerant.

Ceterum has *Tabernas*, de quibus *Ammianus* loquitur, non ad *Rhenenses* trahendas esse, ut laudatus modo *Clunerus* lib. II cap. XII p. 44 uult, pluribus ostendit *Dionysius Petavius*, eruditissimus sodaliti *Ignatiani Presbyter* & scriptor, adnotationibus in *Iuliani* epistolam ad *S. P. Q. Atheniensem* p. 101.

Hunc autem in finem cum *Tabernae* nostrae *montanae* conditae fuerint, minime hic audiendos cenfeo *Seb. Münsterum* & *Atartinum Zeilerum*, qui eas ab castris, quae *Romani* hic locorum habuerunt, natas ortasque existimant; ille, lib. III *Cosmographiae* cap. CLXXIII p. 660; hic uero *Topographiae Palatinae Rheni & uicinarum regionum* p. 16.

Nec

domos, in regionum faucibus positas, quum temporis progressu, rationibus ita postulantibus, aliae insuper exstruerentur aedes, sensim surrexere uillae; uici, oppida: quorum quaedam *Tabernarum* retinuisse appellationem, statim patebit.

Quibus autem distincte temporibus Romani hic locorum eiusmodi tabernas erexerint, condiderintque, cum scriptores, quod sciam, ad unum omnes taceant\*, nobis

---

Nec scio, an hic per omnia recto incedat tramite *Bernhardus Herzog*, non ignobilis ille Chronici Alsaciae scriptor, quando lib. III cap. XIII pag. 33, *die drey Zabern, inquit, oder Tabernen, als Elßs-Zabern, Bergzabern, und Rheinzabern, sind vestungen zu den gewöhnlichen kriegs-lägern, zur unterhaltung der Römer, gleichsam gast-proniant- oder commissi-häuser gewesen; gebauet zur aufenthaltung und noth-vwehr wider die Alemannier, vvenn sie vollen in Galliam fallen.*

Aniles uero istas narratiunculas, quæ uulgo loci delectatur, sibi quoque modo persuadet, *Tabernas* hæc a *C. Iulio Caesare* fundatas esse, quum in ualle Monasteriensi cum exercitu in hibernis ageret; modo, *Drusii* castra uillae contiguae *Drususweiler* ortum dedisse; appropinquationes uero operum loco isti, qui uulgo *die Approchen* dicitur; legionem *Wallonicam* item *der Wallenhöle*, signa praeterea in monte, uillam *Drususweiler* & oppidum nostrum interiacente, erecta & explicata, *dem Föhnleins-berg* nomen fecisse, indignas, quas refellam, iudico. Siculis enim gerris, ut nemo sanus diffitebitur, uaniores sunt.

- Quod ipsum ante nos iam pridem fassus est *Christophorus Cellarius*, uir, qui ueteres auctores singulari uersauit studio, lib. II *Notitiae orbis antiqui*, immensae tum diligentiae, tum eruditionis opere, cap. III p. 309 his uerbis: *Sunt & tertiae in hoc Rhenano tractu Tabernae, Montanae uulgo cognominatae, Berg-Zabern; quas uero nescio, an in quodam ueteri litterarum monumento reperiuntur.* Contra ea & *Triboccorum* illas, & *Nemetum Tabernas*, praeter *Tabulam Pentingerianam* & *Notitiam Imperii*, habet,

nobis definire minime licet. Id uero res loquitur ipsa, nomen oppido huic nostro, patriae meae dulcissimae, inde esse; uti duobus aliis municipiis, iam iam citandis, nomen, quod a *tabernis* huiusmodi ab initio traxerunt, usque huc mansit.

Vocari autem uernaculo sermone solet *Bergzabern*\*; *Zabern* quidem, littera T, quod Alemanis haud infrequens erat, in Z mutata\*\*: *Bergzabern* uero, ut ab eis, quae in *Nemetibus* Rheno propinquae sunt, & *Rhein Zabern* dicuntur, nec non *Triboccorum* illis, quae *Elfsas-Zabern*, ut nostis,

A 3.

etiam

habet *Antoninus* in *Itinerario*, ut uidere est apud *Beatum Rhenanum* lib. III *Institutionum rerum Germanicarum* p. 612, editionis Vlmensis, cum adnotationibus *Iacobi Ottonis*, & *Cellarium* l. d.

- \* Quo sane nomine plerumque in diplomatibus, documentisque saeculorum superiorum publicis appellatur. Dico plerumque. Nonnunquam enim & simpliciter *Zabern* uocatur: uti in tabulis, quibus *Rudolfus* I Imperator, oppido huic nostro ius ciuitatis dedit, *nilla dicta Zabern*; item in aliis, quibus *Agnes*, Gemini Pontis Comes, an. MCCCXXIII, die Solis ante ferias D. Virgini *Mariae* lustratae festas (*vor unser Frauen Kerztag*) *Gerhardo*, ephebo nobili, *Gerharti Harnasch* de *Wisi-Kirchen* filio, sex libras Hallerorum feudi siue beneficii titulo, in praedio suo extra portam *Tabernarum* harum *montanarum* sito, constituit & adsignauit (*uff unserm hofe, der da gelegen ist ussen an der Stadt Zabern*)
- \*\* Id quod plura alia uiribum nomina nobis manifestum faciunt; exempli gratia, *Tucconia*, hodie *Tugium*, uulgo *Zug*; *Turicinum* item, *Turegum*, hodie *Zürch*; tum uero *Durae aquae*, uulgo *Zurzach*; ut probe obseruarunt *Guillimanus* lib. I de rebus *Helueticorum* cap. V § 8 p. 17, lib. III cap. V § 2 p. 150, *Goldastus* in glossis ad *Walafridum* de *uisa S. Galli* lib. I cap. IV p. 250 tomi I *Scriptorum Alemannicorum*, nec non *Hottingerus* sectione I *Speculi Tigrini* § I adnotat. lit. c) p. 5.

etiam nunc appellantur, hoc clarius apertiusque distinguatur.

Apposite uero *montanas* nuncupari *Tabernas*, nemo, loci gnarus, facile diffitebitur. Ita enim ad radices iugi, quod Biponto huc excurrit, iacet, ut si eidem esset inditum.

Quod dum dico, colligere uosmet ipsi potestis, ad fines id tractus, quem *Vasgoniam*, latine pagum *Vosagensem* nuncupari, aliquoties ex hoc suggestu iam audiuiſtis, situm esse\*. Cum autem ad iugi huius, cuius in adscensu ſtat, radices ampla admodum hic ſe pandat, porrigatque planities, eaque cum fertilis, tum multis uillis, uicisque frequens, facile iudicatu eſt, quam amoenum, quam laetum, quam commodum itidem obtineat ſitum. Hortis certe, pomariis, pratis, agris, praecipue uero uineis, ab utraque parte, ſiniſtra potiſſimum, in collibus adiacentibus plantatis, ac poſſeſſoribus impenſas in culturam factas largo uini prouentu remunerantibus, cumulate cingitur; ut de caſtaneto, quo

\* Sunt quidem, qui ad *Alſatiam inferiorem* id referant; eosque inter auctor libri notiſſimi, cui titulus: *Reales Staa's- Zeichnungs- und Conuerſations-Lexicon*, ſub uoce *Bergzabern*: quem tamen falli & errare, non eſt, quod dubites. *Alſatiae* quidem contiguum, non autem eius pars eſt. Conſer Scriptum, quo *Rex Suaeiae Gallicorum tribunalium, Metenſis ſcilicet & Briſacenſis, factis & attentatis in Ducatum Bipontinum ſe granatum ſentis*, tomo I *Sylogos negotiorum publicarum*, quam *Lunigius* edidit, n. CCLXII pag. 691 & ſeq.

quo superbit, uberi iuxta atque iucundo, taceam. Adhaec amniculo interluitur, qui, tametsi nullo peculiari insignitus sit nomine \*, multum tamen, cum oppidi, tum uicinarum rationibus conducit: duodecim enim molas intra limitem contiguum agit. Ceterum, ne interualla, quibus ab locis finitimis disiunctum est, sicco prorsus pede praeteream, a *Veissenburgo*, Vosagi oppido, quatuor, ab *Landauia*, munitissima illa Gallorum ad *Queicham* urbe, sex, ab *Rheno* flumine decem millibus passuum abest, & si id afferre operae pretium est, *Spirensis* Episcopatus dioecesi comprehenditur.

Haec cum de oppidi nostri situ dixisse sufficiat, exponendum mihi iam esset, quorum adhuc in ditione id

\* Videas quidem, passim rivum hunc *Erlebach* uocari; sigillatim in *Lexico uniuersali Fruschiano*, sub uoce *Bergzabern*; item in minori illo, quod modo citavi, eadem sub uoce; tum maxime in *Koeleri*, uiri celeberrimi, *Isagoge in Geographiam germanico conscripta sermone* p. 496; quin, in adnotationibus *Ortonis* ad dictum *B. Rhenani* locum p. 613. Sed minus bene, recteque. Amniculus enim, qui oppidum nostrum permeat, alius plane est ab illo, qui *Erlebach* dicitur. Is enim e fonte, in uilla *Bürckenhörde* dicta, uno milliario a *Tabernis* nostris remota, nascitur, ac postquam eas pertransiit, & per uillas aliquot alias cucurrit, *Tabernas*, quae in *Nemetibus* sunt, desertur, & inde aquas suas *Rheno* miscet. Hic uero, *Erlebach* uocatus, e fonte inter uillas *Ober-Schlettenbach* & *Förder-Weidenthal* (quae ditionis sunt *Leininga-Heidesheimensis*) profluit, & per uillam *Erlebach* (cui nomen dedit) ac *Nieder-Schlettenbach* delapsus, non *Rhenum*, sed *Lutteram* siue *Lutram* (die *Lauter*) ingreditur. Incolis certe loci, quos hic iure audiendos esse, uix negaueris, ille noster *αἰνέριμος* est.

id fuerit ac potestate. Sed enim, cum non aliorum fuerit sub imperio (quantum quidem ex annalium monumentis mihi cognitum est) quam eorum, quorum dominatui Bipontum subiectum, obnoxiumque fuisse modo audiuiſtis; ſatis erit, ne ueſtra abutar patientia, paucis repetere, uetuiſſimis id temporibus paruiffe *Comitibus Bipontinis*; ab his in *Domus Palatinae* Septemuiralis ueniſſe dominium; in hac *Stephano, Ruperti* Caſaris filio, una cum *Biponto, Hornbaco*, aliisque poſſeſſionibus, in auiti patrimonii partitione, ceſſiſſe; ab hoc uero filio *Ludouico*, qui familiam, ut audiuiſtis, *Bipontinam* condidit, una cum terris Veldentinis, ceterisque iam ſaepius dictis locis, tranſcriptum fuiſſe; cuius ſereniſſimis poſteris uſque ſubditum ſit\*.

Non minori autem his, quam illis, curae fuiſſe, nolim dubitetis. Vt enim Comitibus Bipontinis, *Eberhardo & VValramo*, debet, quod ſaeculi XIII anno ſexto & octogeſimo\*\* ciuitatis iura ab *Rudolfo I* Caefare,

\* Confer huc, ſi placet, quae in adnotationibus ad orationem de oppido *Hornbaco* p. 22 & 23. habentur. Nec enim rem, ſemel iterumque iam dictam, ſolemnibusque teſtimoniis firmatam, multis hic repetere iuuat.

\*\* *Bernhardus Herzog* quidem lib. V *Chronici* laudati p. 37 uult, id anno MCCLXXXV, die XX Iunii factum eſſe. Sed errat. Tabularum enim, quibus iura ciuitatis ab eo obtinuit, clauſula diſerte teſtatur actum, id anno, quem dixi, LXXXVI, d. XI Kalend. Maii, in caſtris apud *Lutterburg*. Adi modo (mordet enim iam carceres) *Spicilegium II Tabularum ueterum nondum editarum*, quod fecit G. C. *Ioannis*. In eo enim inter tabulas miſcellas habetur.

sare, augustissimae, quae etiam nunc floret, domus Austriacae fundatore, tam felicissimo, quam gloriosissimo, obtinuerit: ita Serenissimis *Ducibus Biptontinis* alia inter hoc maxime acceptum fert, quod e bellicis calamitatibus, quibus, ut breui intellecturi estis, semel iterumque uexatum, & tantum non ad incitas redactum fuit, sensim emerferit, pristinaeque recuperauerit speciem; tum uero hodie, arce *Newcastell*, ordinaria quondam Praefecti sede, cum temporum iniuria, tum aeuo prolapsa, praefecturae gaudeat honore ac praerogatiua.

Exspectatis autem, sicut uideo, ut, habita ordinis recepti ratione, ex aedificiis, quae habet, publicis potiora designem. Aduertite igitur; Primum, quod e ciuiliū & profanorum genere unum hic commemorandum censeo, arx est, situ tum peramoena, tum multis aliis dotibus commendanda; ut mirum haud sit, quod Serenissimis, quibus adhuc subsuit, Principibus subinde placuerit, in secessum eam, uindemiarum praefertim tempore, deligere. Ad eos ipsos autem refert, quod iis oblectamento fuerit, ciuitati uero decori, ornamentoque. Ab *Ludouico* enim *II*, *VVolfango*, & *Ioanne I*, laudatissimis Principibus, uario accessionum atque elegantiarum genere exculta fuit;

B

&amp;

\* Ab antiquo scilicet iam hic *Burgum* stetit, siue arx, quam ueteres *Gemini Pon-*

& quum incendio, aliisue belli casibus pristinum amisisset splendorem, eam, quam nunc prae se fert, dignitatem a Serenissimo nostro, quem DEVS seruet! Principe accepit: Is enim e squalore eam non eduxit modo, uerum etiam meliorem ad usum, & maiorem magnificentiam multo sumtu reuocauit\*. Adhaec horto perquam amplo, iucundoque instruxit.

Tem-

*Pontis Comites si non statuere, tamen rebus ita ferentibus inhabitauerunt. In tabulis enim, quibus Eberhardus & Lisa Tabernas nostras Ruperto praefeniori anno MCCCLXXXV partim uendiderunt, partim obtulerunt; necnon in iis, quibus de securitate Burgenfi, in terminis Tabernaemontanis custodienda, cum Ruperto, cognomine Duro, pactiorem anno MCCCXC fecere, diserte legas; Bergzabern unser Burg und Statt; item Stadt und Burg Bergzabern. Confer Ioannis Specimen I Animaduersionum in historiam Tolneri Palatinam n. III p. 13 & 18. Veterem hanc arcem Serenissimi, quos dixi, Principes subinde refecerunt, & nouis accessionibus amplificauerunt. Bencherus, scriptor domesticus, narratione de Ducibus Bipontinis uernaculo sermone scripta p. 10; Dieser Hertzog Ludwig hat die Schloß Kirckel, Novelden, Lichtenberg, Landsperg, Bergzabern, Newcastle zum theil von neuem erbauet; & p. 14; Dieser Hertzog Wolfgang hat drey Stöck im Schloß zu Bergzabern- und das Amphhaus zu Bergzabern gebauet. rursum p. 19; Dieser Hertzog (Ioannes I) hat einen Stock im Schloß zu Bergzabern, samt dem Thruverck, auch erwas an den Schloßern Kirckel, Lichtenberg, und Novelden verbessert, und aufgebauet.*

- \* Anno quidem MDCCXXV. Id quod posteritatis memoriae sequenti proditum inscriptione, quae supra primariam illius portam, carmini de horologio modo dicto, uersibus latinis & germanicis scripto, subiuncta, literisque auratis lapidi incisa est:

ANNO MDLXI HAT HERTZOG WOLFFGANG PFALTZ-  
GRAFF BËY RHEIN, HERTZOG IN BAYERN, DIESES  
SCHLOSS ANGEFANGEN ZV BAVEN, DESSEN SOHN ABER

10-



Templorum uero, ut & ea quoque attingam, duo sunt; unum peruetus, *S. Martini* memoriae & honori quondam dicatum, quod ciuibus atque incolis Romano-Catholicae & Reformatorum religioni addictis patet: alterum nouum, & Serenissimi Principis nostri permissu ante decem hosce annos denu exstructum; quod incolarum, qui Augustanam Confessionem sequuntur, proprium est. Antea enim in coenaculo quodam arcis, hunc ad usum aptato, sacris operari consueuerant.

At nunc calamitates, bellicue iniurias, quibus olim *Tabernas nostras montanas* uti grauitur afflictas, ita benigne a Principibus ac Dominis suis, Serenissimorum

B 2

rum

IOHANNES I MDLXXIX ZV ENDE GEBRACHT. NACHDEM ABER SOLCHES DVRCHE DIE DARAVFF ERFOLGTE VIELFALTIGE KRIEG VERWVSTET VND ZERSTOERET WORDEN, HAT DASSELBE NACH ERLANGTEM BAADISCHEN FRIEDEN, VND IN ANNO MDCCXIX ANGETRETTE NEN HIESIGEN LANDTS-REGIERVNG, DER DVRCHELVCHTIGSTE FVRST VND HERR, HERR GVSTAV SAMVEL LEOPOLD PFALTZGRAFF BEY RHEIN, IN BAYERN, ZV GVLCH, CLEVE VND BERGEN HERTZOG, FVRST ZV MOERS, GRAFF ZV VELDENTZ VND SPONHEIM, DER MARCK, RAVENSPERG VND RIXINGEN, HERR ZV RAVENSTEIN, RITTER DES ORDENS *STI HYBERTI*, HOCHGEDACHTEN PFALTZGRAFF *WOLFFGANGS* VHR-VHR-ENCKEL, WIEDER REPARIREN VND IN GEGENWERTIGEN STANDT SETZEN LASSEN, SO GESCHEHEN ANNO MDCCXXV. Velim autem uerba, quod *Wolfgangus* arcem hanc exstruere coeperit, cum gramo salis accipias, & ex eis, quae dicta sunt, interpreteris.

rum *Comitum Palatinorum* sanguine profatis, leuatas esse, paullo ante monui, breuiter percurram. Illas inter prima, quod quidem ego cognouerim, fuit, quam anno c<sup>l</sup>CCCCCLV subiit. Cum enim diffidia inter *Fridericum*, Palatinatus Septemuiralis tum temporis Administratorem, *Victoriosi* cognomento uulgo illustrem, & *Ludouicum*, Ducem Bipontinum, suborta in hostiles utrobique machinationes excessissent, ille contractis copiis eas circumfedit, ratus, ut Princeps erat nec consilio nec manu segni, rationibus suis nil aptius esse, quam praesentes nocendi uires hosti adimere. *Ludouicus* enim urbem milite copioso firmarat. Multum autem tum damni fecit, tam in agris, quam hortis & uineis, quin aedibus ac moenibus ipsis. *Fridericus* enim per quatuor & uiginti dies multis eam operibus oppugnauit, actandem murorum parte deiecta, portarumque una refracta, toto cum agmine in eam sese intulit. Depopulatione tamen & caede, quod locus cognati Principis erat, suos abstinere iussit\*: quin *Ludouico*, cum pacem missis legatis peteret,

- \* *Trithemius in Chronico Hirsaugiensi* ad an. MCCCCCLV p. 429; *Fridericus magnum suorum adunauit exercitum, & oppidum Bergzaberen, ubi Dux Ludouicus praesidia locauerat sua, obsedit, & diebus XXIV fortiter impugnans, tandem in festo S. Tiburtii Martyris expugnauit & cepit.* Quibus uerbis *Marquardus Freherus in Historia Belli Bavarici*, quam totam ex parte II *Chronici* istius, sua aetate nondum publici iuris facta, confarcinauit, ac uolumini *Scriptorum rerum Germanicarum* alteri inferuit p. 330, editionis Struuianae, hos ex anonymo poeta subiunxit uersus:

*Plan-*

teret, urbem ipsam hac conditione restituit, ut uerbis conceptis polliceretur, Palatinatui Septemuirali in po-

B 3

sterum

*Plantis dum calcas nudatis, sancte Tiburti,  
Horrendas prunas, Bergzabern uiribus intras  
Ecce Palatine Comes inuictissime portas.*

Paullo fufius *Paulus Hachenbergius* lib. III uitae *Friderici Victoriosi*, ad annum eundem: *Ibi Palatinus animo commotior, ad uindictam confur-  
git, & contractis undique copiis ad Tabernas Montium oppugnandas pro-  
cedit. Sita urbs est in nicinia Weissenburgi, sicut non magna, ita munita  
uastis uallis & altitudine moenium, inessaque ualido praesidio; nam hic robur  
& florem militiae suae Bipontinus posuerat. Ad Rhenum usque Palatinus  
stationes suas extendit, nullum excitatur incredibili celeritate, & circa ur-  
bem ducitur, multi anfractus ad moenia instituntur, fossae cratibus, uir-  
gulisque contabulantur, nulla pars nocturnis temporis ad laborem intermit-  
titur. Mittuntur ad Spirensen civitatem litterae, ut frumento, commea-  
tuque castra prouideat; simul queritur Princeps, hostes in urbem recipi, &  
arma, annonamque diuendi iis, quod se ex Palatino exercitu uenire, salvo  
ementirentur; rogat, nullum intra moenia sua admittat, nisi qui litteras  
nomine & sigillo Electoris Palatini munitas exhiberet. Inter haec & Prin-  
ceps, ne segnis sederet tantum ad urbem, equitatum in circumiacentem a-  
grum mittit, qui nullus passim uastauit, & praecurrentes pabulatum ho-  
stes secundis aliquot uelitationibus compulsi in siluas, & non minus mag-  
num numerum occidit: quo factum est, ut manus hostium in omnem occasio-  
nem diducta, ad soluendam obsidionem inhabilis esset. Iamque neces-  
sarius oppugnationis dies erat, quum impetu ex omnibus castris facto, non  
modo ad muros se constipauit miles, sed etiam per deiectas moenium ruinas  
emerfit. Ibi ex omni parte relictis stationibus fugere oppidani, & pauore  
omnia miscere; caedi inde portas & refringi, signa Palatina toto cum ag-  
mine in urbem inferri. Sed direptione & caede, quod cognati Principis fu-  
isset, uictor abstinere iussit. Hac urbis primariae amissione omnis ferocia ex-  
cidit Bipontino, ut legatos supplices ad Palatinum mitteret, & de finiendo bello  
uerbis humilibus ageret. Neque pacem abnuebat Palatinus, facilis fuisse  
iram, quum subtrahere forti turbulentoque homini inuita monita temeritatis  
auferet, enimque beneficiis continendum putaret. Iltum foedus fuit, & Lu-  
do-*

sterum neque ui, neque consiliis unquam se obfuturum esse.

Saeculo sequenti, cum agrestes, anno supra uicesimum quinto, communi seditione excitati, crederent, omne dominorum iugum se, sociatis armis, excussuros, & quam foedissime tumultuantes innumera passim crudelitatis exempla darent, una cum pluribus aliis urbs haec nostra in praesentissimum uenit discrimen. Agmen enim, quod a rotunde tonsis capillis *tonfile* uulgo uocabatur, & eam suae fecit potestatis, & infedit; ciuibus atque incolis in uniuersum omnibus metu, terroreque, nimium quantum, perfusis & attonitis. Satis enim superque uidebant, quantis in malis iacerent; nec dubium, quin in istis periissent, nisi perditam istam perduellium manus, audita suorum strage, properato domum se proripuisset\*.

Hoc

*Ludovicus uerbis inranis conceptissimis, se ab armis discessurum, & Palatinatum neque ui neque consiliis unquam obfuturum. Ita poenitenti reddita urbs, sed medicus ager cis Rhenum ademptus fuit.* Dum addit, inter pacis condiciones fuisse, ut agri quadam in strata montana parte *Ludovicus* decederet, *Bernhardum Hertzog* sequitur, errans errantem. Quod enim subsequenter annis contigit, hic lib. I *Chronici Alsaciae* cap. LVII p. 107 perperam huc trahit. Haec illi. Vnde satis patet, corrigendum esse *Zeilerum*, dum l. d. *Fridericum* quinque hebdomadas & tres dies *Tabernas* nostras circumfedisit atque oppugnasse tradit.

- \* Videantur *Hubertus Thomas* *Leodius* & *Petrus Crinitus*; quorum quidem ille in *seditionis rusticanae historia*, tomo III *Scriptorum rerum Germanicarum* a *Frebero* editorum p. 191 breuissimis rem perstringit; hic uero, tomo

Hoc erepta periculo, in profundum quasi omnium miseriarum deiecta fuit misera haec urbs, cum bellum triginta per annos in se ipsam aleret ipsa Germania. Praeterquam enim, quod modo ab inimicis, modo ab amicis oppressa, spoliata, exinanita fuit, famis praeterea, &, quae eam comitari plerumque solet, pestilentiae tam graui flagrauit incendio, ut, ciuium & incolarum numero ad paucissimos redacto, forum ipsum gramine obsitum esset, dumisque.

Tandem, quid in infelicitate extremum esset, experta fuit, funesto illo, quod ab anno saeculi superioris LXXIII Galli Germaniae rursus intulerunt, bello. Tum enim ab iis anno clobCLXXVI, missa ad illam inflammandam Philippiburgo equitum desultoriorum, rectius fortasse dixerim, incendiariorum, turba, paene tota in cineres redacta est\*.

Ceteras difficultates, expilationes, acerbitates, quas sequentibus annis, cum Galli, pace Neomagensi & Ryfsvicensi inique rupta, binis vicibus bellum his in  
oris

---

tomo eodem p. 252 paullo fusius his recenset uerbis: *Hoc agmen consile, — tandem Annweiler & Bergzabern iam oppidis, suam in potestatem redactis, Thymopolitano exercitus, ut diximus, iuncti, audita fratrum suorum frage, domum se proripuit.*

- \* Contigit id tempore natalitiarum Domini feriarum, circa noctem concubiam. Conf. *Theatrum Europaeum* parte XI p. 984, & ex eo G. C. Ioannis appendicem posteriorem ad *Parci historiam Banarico-Palatnam* p. 479.

oris circumferrent, semel iterumque sustinuit, de consulto lubens praetermitto.

Gestit enim animus, postremum orationis meae caput persequi, & uobis uiros, quos, tanquam alma praestantiorum ingeniorum mater, edidit, doctos, maximeque eruditos strictim ob oculos sistere. Praetereo autem *Ioannem Thomae*, *Nicolai Thomae*, dioecesis Tabernaemontanae ecclesiasticae Inspectoris siue Ephori filium, nec non *Nicolaum Frisium*, liberalium artium Magistrum, ambos Lycei Hornbacensis Professores\*. Neque enim editis in lucem ingenii aliquibus

mo-

\* Quorum ille quidem Witteberga, ubi liberalibus studiis operam dabat, litteris publicis Hornbacum arcessitus, an. MDLIX d. XXI Iun. quartae Classi praefectus fuit: quam cum fideliter, una cum paedagogia, administrasset, an. MDLXI *Hilspachio* successit, secundae Classis Professor declaratus. Auctis postea pensis scholasticis anno MDLXXV Rectori in Classe prima adiunctus est. Missistandem laboribus scholasticis, Bionti *Ioanni I* Duci a bibliotheca fuit: qua etiam in statione an. MDCII d. XI Sept. uiuendi finem fecit. Circa an. MDXCVI nescio quid consilii de *Psalmis* secundum *Lobvasserii* uersionem in latinam linguam transferendis cepisse uidetur. Saltim, ut ita coniciam, facit *Isaachi Cramerius*, curiae tum Gymnasii Hornbacensis tertiae Professor, his ad eum uerbis, in epistola a. d. d. XVIII Martii signata, usus: *De Lobvasserii uersione nihil accepi, nec uidi, neque an huiusmodi aliquid in lucem prodiiit, scio. Non autem existimo, quod pace tua dixerim, tanta facilitate in latinum sermonem transferri posse, qua in uernaculum nostrum; hanc maxime ob causam, quod metra Romana id non admittunt, nisi quis noua genera carminum uelit in theatrum producere; quam laudem tibi, clarissime uir, tantum abest, ut innideam, ut, si ulla ratione possem, pro meo modulo augere, nihil in me desideraturus sis.*

*Hic*

monumentis nominis sui famam posteritati prodidere, rati, praestantissimum gloriae genus esse, diligentia, fide, docendique dexteritate officii sui rationes conficere. In his autem, qui scriptis publico iuri concessis inclaruere, agmen ducit *Cunmannus Flinsbachius*, uir pietate, doctrina, singularique animi moderatione in paucis suo tempore conspicuus; qui suis hisce uirtutibus meruit, ut uix quinque & uiginti annos natus, Biponti ecclesiae Symmysta, & ceterarum in hoc Ducatu Antistes constitueretur. Quo quidem in munere per duodeuiginti annos industria, constantia in uerae religionis professione, uitae integritate, praestabilique in negotiis sacris, iisque perarduis, prudentia omnes laudis numeros tam curate impleuit, ut Principi gratus, collegis & auditoribus ad unum omnibus in deficiis esset. Reliquit *Chronologiam*, *Genealogiam Christi*, & id genus alia\*. Proxime sequitur *Conradus Hubertus*, uir

C

ad

---

*Hic uero, Argentorato, ubi Magistri consequutus est honores, rediit, Iodoco Rhodio an. MDLXXXVI ad regendam scholam Trarbacensem euocato, surrogatus, classẽ quartam, una cum paedagogia, ab d. XVIII Iunii usque ad d. XX Maii anni sequentis LXXXVII, moderatus est; quippe quo Tabernas montanas concessit, constitutus ibidem ecclesiae patriae Diaconus; cui cum per tres inseruisset annos, an. MDXCI Spiram abiit, Ecclesiastes illic factus.*

- \* Qui plura uelit, adeat *Melchiorẽ Adami* in uita eius p. 218 & seq. & qui eam in compendium redigere, *Paulum Freherum* in *Theatro uirorum eruditum* p. 226, nec non *Casparem Sagittarium* cap. XV *Introductionis in historiam ecclesiasticam* § II p. 324 & seq.

*Chro-*

ad laudem insignis. Argentorati enim *Buceri*, grauissimi, doctissimi que illius temporis Theologi, familiaritate per integros octodecim annos usus, domesticaque illius disciplina imbutus, in *D. Thomae* aede sacram ascendit cathedram. E qua cum plures annos docuisset, aetate, consilioque grauis, Deo lucis usuram reddidit\*.

Eodem ceteroqui, quo naturae concessit, anno  
Ga.

*Chronologia*, quam ab orbe condito usque ad annum Christi MDLII confecit, primum edita est Wittebergae an. MDLIII, dein Argentorati an. MDLXVII. *Genealogia* uero *Christi* tabulis explicata, Basileae primum prodiit ex officina Oporini, & dein an. MDXCVII e typographico Königii; quam dum *Boesclerus* cap. V *Bibliographiae Originicae* § XXVI p. 173, nescio qua ductus ratione, cum *Hemmingesii*, *Albizii*, *Rensneri*, *Rottershusii* operibus genealogicis, unam in seriem compingit, auctorem male *Gottmannum Flinsbachium* uocat.

- \* Videatur *Michael Philippus Benther* sectione II libri, *Wahrhafter, gründlicher Bericht von der zu Strassburg anno 1598 in druck ausgegangenen veränderter Kirchen-ordnung* inscripti, § VIII p. 229 & 230, *Albertus Meno Verpoortennius* § XVII *Commentationis de Martino Bucero historicae* p. 51, & § XLI p. 186. Dignus certe *Bucero* uisus fuit, quem alios inter testem adhiberet, quum an. MDXLVIII Augustam iussu publico accitus, d. XXIII Ianuarii ultimae uoluntatis suae tabulas ederet, uid. *Benther* l. d. § VII p. 123. Quod confessioni tetrapolitanae singulari inhaereret animi firmitate, haud leui cum *Joan. Marbachio* contentioni implicitus fuit; quin in suspensionem incurrit, ac si in dogmate *uolens deum uolens* cum Caluino faceret: qua tamen ante obitum, uel ipso *Marbachio* teste, sese exsoluit. Vid. *Ludonicus Rabus* in epistola an. MDLXXVII d. XXVII April. ad *Marbachium* data, quae CCXXIII est partis IV *epistolarum theologicarum* a *Fechio* editarum, p. 572. Vita autem excessit an. MDLXXVII.



Gamalielis sui optimi, *Buceri*, scripta Anglicana unum in uolumen redacta, euulgauit\*.

Hos excipit *Ioannes VVolfius*. Quem si summum patriae suae decus atque ornamentum dixerō, minime gentium errabo. Cum Dolae in Burgundia licentiam summos in utroque iure honores petendi insigni cum laude nactus esset, & paullo post in Germaniam reuersus Spiraē Nemetum magnam, caussis studiose defensis, nominis consequutus esset celebritatem, a Principe Electore Palatino commendatus, Adfessorum in ordinem ascendit; e quo tamen non longe post ad armatam pertractus est militiam. *VVolfango* enim Duci, nunquam sine summa honoris testificatione a nobis nominando, cum exercitu in Gallias profecturo, suam, maximo expetitus opere, operam ad-dixit. Quam cum ei, tum filiis serenissimis, eo mortuo, abunde praestitisset, a *Philippo Ludouico & Ioanne I* fratribus, grauissimis negotiis adhibitus, & ad Angliae Reginam secundum, ad Poloniae Regem semel, arduis maxime de rebus, missus fuit. Post a *Carolo*, Marchione Bada-Durlacensi, in sanctiorem allectus senatum, & municipio Mündelsheimensi praefectus, omnem de se spem laudabiliter sustinuit, si non

C 2

uicit;

\* Visum quidem nonnullis, quasi fide fluxa ea collegerit, edideritque: quibus tamen *Verpaccennius* laudatus l. d. § XLI respondit, eumque ab iniquiore & tristiore eorum censura liberauit p. 183 & seqq.

uicit, & ab filiis eius semel iterumque ad aulam Caesarem delegatus, ipsi *Rudolfo II* Imperatori & fidem & prudentiam quam maxime probauit. Tandem uiribus exhaustis, rude donatus, Heilbronnâ, urbem imperialem, secessit, ac morbo repentino anno MDC correptus, die XXIII Maii placide expirauit\*. Conscripsit *Clauem historiarum*: *Roberti* item *Gaguini rerum Gallicarum annales*, nec non *Alberti Crantzii Chronicon regnorum aquilonarium* recudi curauit\*\*: tum uero praestantissimum *rerum memorabilium* opus confecit, atque eodem, quo obiit, anno Latinae suis sumptibus prelo submisit\*\*\*. Percelebri huic

lu-

\* Confer huc uitam eius, quam *Melchior Adams* in uitis *Iurisconsultorum* e panegyrico *Gregorii Rottuagen* dedit, p. 156 & seqq.

\*\* *Clauem historiarum* edidit an. MDLXXIV, eamque *Friderico*, Duci *Würtembergico*, inscripsit. *Gaguini annales rerum Gallicarum*, uiri clarissimi, *Hermani Dieterici Meibomii*, iudicio, ualde insignes, cum exempla eorum desiderarentur, *Francofurti* an. MDLXXVII preli beneficio repetiit; *Crantzii* uero *Chronicon rerum aquilonarium* cum praefatione sua *Francofurti* anno MDLXXV (quam editionem optimam esse censet *Nicolaus Petrus Sibbern* cap. I *Bibliothecae historicae Danonorruogicae* § XI p. 30) & rursus an. MDLXXXIII, quam *Indeu Jacobi Ziegleri*, *Matheseos* in academia *Vpsalienti* Professoris, *Scandia*, & *Henrici Ranzonii* duobus libris *de bello Dithmarsico* a *Friderico II*, *Daniae Rege*, & *Holsatiae Ducibus*, *Ioanne* & *Adolfo*, an. MDLIX gesto, subiectis, auxit.

\*\*\* Quo etiam duobus tomis, formae maioris, prelo exiit. Recusum postea *Lipsiae* anno MDCLXXI; sed admodum mendose. *Millenisi* phlomaticis typographicis ultimam hanc editionem refertam esse, *Iacobus Friedericus Reimannus* parte II *Isagoges in historiam litterariam Germano-*

Iurisconsulto temporis ratione proximus est *Iacobus Theodorus*, ab oppido hoc nostro, solo suo natali, uulgo *Tabernaemontanus* cognominatus. Qui, cum *Hieronymi Tragi*, praeceptoris sui, institutione; proprioque ingenii instinctu animum ad artem salutarem applicuisset, medicinam non solum apud plebeios, sed Principes etiam uiros quam felicissime exercuit. Fuit enim a cura corporis *Ludonico*, Septemuiro Palatino, *Marquardo*, Episcopo Spirensi, *Adolfo*, Comiti Nassouio-Saraepontano. Egit etiam Physicum, quem uocant, ordinarium urbis Vangionum & Gymnasii, quod tum prope eam floruit; *Neuhusiani*. Posteritatis bono rem medicam pluribus libris foras editis promouit. Inter quos *Herbarium*, quod multo labore, usuque congeffit, copiosissimum\*, & *Hydro-*

C 3

dro-

*norm*, quaestione CLXVII p. 271 scripsit. Ceterum non sine utilitate illud legi, censet *Caspar Sagittarius* cap. XXVIII *Introductionis in Historiam ecclesiasticam* § V p. 770, tametsi non diffiteatur, quod naeuia haud careat, & multis, praecipue in ipsis nominibus & aetate Scriptorum ueterum, hallucinationibus.

Quod alioquin *Gnilielmus Crovvaens* in *Elencho scriptorum* p. 239 cum non satis accurate a *Ioanne Wolsio*, Tigurino, sacrarum litterarum in schola patria Professore; *Hemmingus* uero *Wittenius* tomo I *Diarii Biographici* ad an. MDCXVI lit. N 1 a) a *Ioanne Wolsio*, Marburgensi, Medicinae in academia patria P. P. Archiatroque Hassiaco, distinxerit: *Ioannes Henricus Boeclerus* denique cap. XXVII *Bibliographiae* laudatae § V p. 250, cum *Hieronymo Wolsio*, Oetingensi, confuderit; *Ioannes Moellerus* iam notauit *Homonymoscopiae historico-philologicae criticae* sectione II cap. VI § CXLII p. 732; & in addendis praefationi subiungitis.

\* XXX. aenorum opus, uiuis herbarum, fructuum, florum, frugum, & alio-

*dro-theſaurus* ille, uernacula *VVasserschatz* \*, omnium sunt praestantissimi. Qua occasione non possum, quin memorem, quod celebratissimarum *acidularum Sualbacenſium* usum, postquam uires earum ipse forte fortuna suo in corpore feliciter expertus erat, primus inuenit, aliisque commendauit, tot sane laudibus ob hoc ipsum celebrandus, quot illae usque huc mortalibus uarie aegrotantibus ualeitudinem restituerunt, aliis uero firmarunt \*\*.

### Super-

aliorum additis iconibus, simulque qualitatibus eorundem ac uirtutibus explicatis; quod quum praestantia sua se commendaret, semel iterumque prelum subiit, & a *Caspere & Hieronymo Bauhinis*, Medicis praestantissimis, botanicesque praeter ceteros gnaris, auctum & locupletatum est. Quorum cum accessionibus postremum, ni fallor, an. MDCLXXXVII Basileae lucem uidit.

\* In lucem prodit an. MDCV, 8, hoc titulo: *Neu Wasserschatz, das ist, von allen heylsamen metallischen, minerischen Bädern und Wassern, sonderlich aber von dem neuen erfundenen Sauerbrunnen zu Langen-Schwalbach* cet.

\*\* Qua occasione id factum sit, pluribus ipse dicto libro cap. III p. 12-35 memorat. Summa huc redit. Quum anno MDLXIX, *Philippi Brendel* ab *Homburg*, Vicedomini Moguntini, rogatu, eocum *Macro-Sualbaccum* iuisset, ut ex acidulis loci, illarum, quae uulgo der *Weinbrunn* dicebantur, qualitates siue *intrinsecutas* gustando exploraret, ex inopinato sensu, cum uix heminam illarum subbibisset, se malo (quod anno superiori Baccarae, Episcopatus Metensis oppido, ueneno potu infectus, contraxerat) eoque sat graui (illius enim reliquiae itatis quotidie periodis recurrebant) aliqua ex parte leuari. Spem igitur ingressus, diuina adspirante gratia fore, ut, particulis reliquis earum potu propulsatis, reconualeſcat, *Francofurti ad Moenum* (ubi tum cum Hero suo, *Anſtite Spirensi*, in conuentu Ordinum Imperii agebat)

Superest, qui iisdem institit uestigiis, *Henricus Fabricius*, Tabernis montanis anno MDXLVII, felicissimis sideribus, in lucem editus. Eleganti uir ingenio, bonisque omnibus disciplinis ornatus. Qui non solum id habuit honoris, ut anno MDLXXII, cum Spirae Nemetum in comitiis legatorum Belgicorum interpretem ageret, ab ipso Caesare *Maximiliano* II lauru poetica coronaretur, ac biennio post ex Italia redux Basileae artis medicae renunciaretur Doctor: uerum etiam spartam, quam ornaret, simul ac serenissimo Duci *Ioanni* I praesentem se stiterat, consequeretur, Physices & Matheseos Professor eodem, quo rediit, anno Hornbaci constitutus. Quam cum singulari obiret fide, dexteritateque, anno LXXVI *Christophori Hilspachii* Rectoris in locum suffectus est; ab ipso serenissimo Hero & nutritore d. II Martii, schola praesente, solemniter muneris in possessionem immissus. Mortem oppetiit anno MDCXII, die XXVIII Martii; cum ab scholae gubernaculis iam anno MDC. incunte recessisset\*. Scripsit orationem

de

---

bar) falsulis his exitu prorsus oprabili usus est. Sensim enim toto corpore salubritatem percepit, ac finito, quod curationi praestituerat, tempore, sanitatem ex uoto recuperauit. Earum itaque nim, quam suo in corpore tam feliciter expertus erat, & aliis commendauit. Vnde post id statim medicati huius fontis inualuit usus, summis, imis, iisque non uno genere morbi afflictis, *Sualbacum*, illarum ut portione ex incommoda ualitudine emergerent, gregatim confluentibus.

\* Cum recederet, sequens, quod huc afferre non ab re erit, tranquillo, moderatoque animo lusit epigramma:

Hae.

*de uita, obituque Hieronymi Tragi Medici & Canonici Hornbacensis*\*; quam tamen in publicum haud dedit\*\*; tum *uaria carmina & epigrammata*\*\*\*.

Nullus autem dubito, quin id mihi nunc ultro sitis largituri, mereri omnino *Tabernas nostras montanas*, ut propter haec sua, quae recensui, decora atque lumina, in eis numeretur oppidis, quae fecundae quaedam, felicesque magnorum ingeniorum exsistere procreatrices.

Ego

---

*Hac Rectoratus insignia fingo tabella,  
Has honor ad tabulas pender, onusque meum.  
Ad tabulas, inquam, quarum tenet altera leges,  
Alteraque officii pensa diurna mei.  
Vos huc, Collegae, celeri contendite cursu,  
Cui tabulae cedens, illico Rector erit.*

- \* Vid. *Adami* in *uita* eius p. 187, *Fabricius* centuria I *Fabriciorum* p. 37; qui tamen memoria uacillauit, dum ibi *Trago Medici Vratislaniensis* titulum adscripsit.
- \*\* *Melchior* interim *Adami* magnam partem in *uita Tragi* suas in areolas deriuauit, p. 32 ingenue fassus, ad eam conscribendam se hac oratione usum esse.
- \*\*\* Quorum quidem centum, cum *Ovvenianis*, *Francofurti* anno MDCXIV, 12, recusa memorat laudatus modo *Polyhistor Fabricius* centuria II *Fabriciorum* p. 50.

Ceterum edidit etiam *Gratulationem ad Ioannem Casimirum, Comitem Palatinum Rheni, & Elisabetham, Augusti Saxoniae Ducis & Principis Electoris, filiam*, *Heidelbergae* anno MDLXX.

Haec summam. Plura dabit, si plura uelis, quem modo citavi, *Melchior Adami* l. d. in *uita* eius: quam, ut alibi iam dictum, *G. C. Ioannis* in *Heptade III* epistolarum *Spicilegio tabularum netherum nondum editarum II* subiunctarum, n. IV, tum supplcuit, tum emendauit.

Ego uero, quod reliquum est, nec pro perpetua mea erga patriam urbem pietate omittere facile possum, a DEO OPTIMO MAXIMO, cuius prouidentia uti ciuitates surgunt, ita eiusdem benignitate stant incolumes, infimis peto precibus, ut eam non solum ab cunctis, quibuscum superiore tempore conflictata est, incommodis ac difficultatibus deinceps benignissime prohibeat, sed ex omni etiam rerum secundissimarum genere, hoc maxime afficiat beneficio, ut ea commendatione, quam a uiris doctis, intra moenia sua natis, modo duxit, nostra etiam aetate denuo efflorescere incipiat, ciuesque adeo producat, qui, *Flinsbachiis*, *Volfis*, *Theodoris*, et *Fabriciis* simillimi, laudem ac gloriam per eosdem *Tabernis* nostris partam, sua quoque uirtute ac doctrina strenue tueantur, augeantque cumulate; quod equidem hoc magis precor, quo minus Palatinae terrae eam amplius praeclarorum ingeniorum copiam effundere uidentur, quam olim felicissime effuderunt, cum & sibi & aliis regionibus uiros quosuis praestantissimos, & ad grauissima quaeque munia ac negotia praeclare administranda aptissimos suppeditarent.



## EMENDANDA atque ADDENDA.

p. 6 v. 23, pro, *quem* tamen, l. *quos* tamen

p. 12 v. 26, pro, *historia belli Banarici*, quo titulo *Seruius* l. d. libellum persperam inscripsit, l. *de rebus gestis Friderici Victoriosi*; quippe quo eundem *Freherus* primum edidit.

p. 15 v. 26, pro 984, l. p. 851.

Ceterum, ut hoc planius constet, quam afflictâ, perditaquetum temporis fortuna *Tabernae* nostrae fuerint, operae pretium nobis uisum, uerba, quae in *Theatro Europaeo*, quod citauimus, hac de calamitate habentur, ipsa in medium adferre. Sic autem ibi: *Nachgehends haben sie auch das Schloß und Stâatlein Berg-Zabern, so ins Fürstenthum Zueybrücken gehörig, ( ungeachtet ihnen die geforderte Contribution vom vorigen Jahr, und auf dieses, bis zu end des Martii voraus richtig bezahlet worden ) wieder gegebene Treu und Glauben überfallen, alle Einwohner, keinen einigen aufgenommen, bis auffs Hembd geplündert, und sonst erbärmlich tractirt, dar-aufferstlich ins Schloß und Amt-Haus, folgendes aber auch in alle priuat-häuser Feuer gelegt, also daß fast alle Gebäude, bis auff etliche wwenige, benebenst allen Mobilien, Früchten etc. im rauch auffgangen. Vber dieses sind die armen Leute noch bedrohet vvoraden, wvnn sie nicht innerhalb 24 Stunden, des Lieutenants du Roy, vvelcher die Troupen commandirt, hinterlassenen Ordre gemâs, die Stadt- und Schloß-Mauren übern hauffen vverffen wwürden, si einer nochmaligen grausamen Heimsuchung, und eines unfehlbaren Blutbads gewärtig seyn solten.*

p. 18 v. 31, pro *officina* l. *officina*.

